

~~T5213~~/0441b  
T 5214.4

21

12

3

CHINESE-JAPANESE COLLECTION  
HARVARD COLLEGE LIBRARY  
FROM HARVARD-YENCHING INSTITUTE

MAR 14 1932

THE UNIVERSITY OF CHICAGO  
LIBRARY  
520 EAST 5TH STREET  
CHICAGO, ILL. 60607  
SEP 14 1983

唐詩紀事卷第六十四

顏萱

送羊振文桂陽歸觀云高掛吳帆喜動容問安歸

去指湘峰懸魚庭內芝蘭秀馭鶴門前薜荔封

蘇耽舊宅  
在桂州

紅旆正憐棠影茂綵衣偏帶桂香濃

臨岐獨有霑襟戀南巷當年共化龍

先輩與拾  
遺叔父同

年

送圓載上人云師來一世恣經行却泛滄波問去

哈佛大學  
圖書館  
珍藏  
印

程心靜已能防渴鹿輦喧時為駭長鯨

師云舟人遇鯨

則鳴

禪林幾結金桃重

日本金桃實重一斤

梵室重修鐵

瓦輕

以鐵為瓦輕於陶者

料得還鄉無別利只應先見日

華生

萱字弘至江南進士也中書舍人蕘之弟嘗受知

於張祐故弔祐詩序曰尚意孩稚之歲與伯氏

常承處士撫抱之仁目管輅為神童期孔融於

偉器萱唐末與皮陸二生酬唱有詩載松陵集

李穀

或作穀

和皮日休悼鶴云才子襟期本上清陸雲家鶴伴

閑情猶憐反顧五六里何意忽歸十二城露滴

誰聞高葉墜月沉休藉半階明人間華表堪留

語剩向秋風寄一聲又云道林曾放雪翎飛應

悔庭除閉羽衣料得王恭披鶴氅倚吟猶待月

中歸

浙東寵府西歸酬別張廣文皮先輩陸秀才詩云

豈有頭風筆下痊  
浪成蠻語向初筵  
蘭亭舊趾雖曾見  
柯笛遺音更不傳  
照曜文星吳分野  
留連花月晉名賢  
相逢只恨相知晚  
一曲驪歌又幾年

穀字德師咸通進士也唐末爲浙東觀察推官兼  
殿中侍御史日休松陵集序云南陽廣文潤卿  
隴西侍御德師咸旅泊之際善其所爲皆以詞  
致師詞之不多去之速也穀西歸日休詩云建

安才子太微仙  
暫上金臺許二年  
形影欲歸溫室樹  
夢魂猶傍越溪蓮  
空將海月爲傖鬼  
恨吳

天詩脫下段

司馬都

和陸龜蒙白菊詩云恥共金英一例開  
素芳須待早霜催  
遶籬看見成瑤圃  
汎酒初迷傍玉盃  
暎水好將蘋作伴  
犯寒疑與雪爲媒  
夫君每尚風流事  
應爲徐妃致此裁

坊刻脫此詩誤入鄭璧作

唐詩紀事 三  
鄭璧

和陸龜蒙白菊詩云白艷輕明帶露痕始知佳色  
重難群終朝凝笑梁王雪盡日慵看蜀帝魂燕  
雨似翻瑤渚浪鴈風疑卷玉綃紋瓊花若會寬  
裁剪堪作蟾宮夜舞裙

坊刻誤作  
司馬都

璧唐末江南進士也與皮陸二生酬唱又有寒夜  
文燕潤卿有期不至詩云已知羽駕朝金闕不  
用燒蘭望玉京應是登仙明月好玉皇留看舞

雙成

崔璞

奉酬霜菊見贈詩云菊花開晚過秋風聞道芳香  
正滿叢爭奈病夫難強飲應須速自召車公

蒙恩除替將還京洛偶叙所懷云兩載求人瘼三  
春受代歸務繁多簿籍才短乏恩威共理乖天

獎分憂值歲飢遽蒙交郡印

到任十二箇月  
除替未及三年安

敢整朝衣作牧慙爲政思鄉念式微儻容還故

里高卧掩柴扉

璞唐末以大司諫刺蘇州其詩見皮陸二生松陵

唱和集

魏朴

和皮日休悼鶴云直欲裁詩問杳冥豈教靈化亦

浮生風林月動疑留魄沙島香愁似蘊情雪骨

夜封蒼蘚冷練衣寒在碧塘輕人間飛去猶堪

恨況是泉臺遠玉京又云經秋宋玉已悲傷況

報胎禽昨夜亡霜曉起來無問處伴僧彈指送

荷塘

朴唐末吳中名士也皮日休松陵詩序云潤卿德

師旅泊之際以詞致師大司諫清河公有作崔璞

或命之和亦著焉其餘則吳中名士謂司馬都鄭壁朴與

顏萱

張賁

旅泊吳門云一舸吳江晚堪憂病廣文鱸魚誰與



伴鷗鳥自成群  
反照縱橫水斜空  
斷續雲異鄉  
無限思盡付酒醺醺

酬襲美先輩見寄云尋疑天意喪斯文  
故遣茅峰寄白雲  
酒後只留滄海客  
香前唯見紫陽君  
近年已絕詩書癖  
今日兼將筆硯焚  
爲有此身猶苦患  
不知何者是玄纁

和陸龜蒙白菊詩云雪彩冰姿號女華  
寄身多是地仙家  
有時南國和霜立  
幾處東籬伴月斜  
謝

客瓊枝空貯恨  
袁郎金鈿不成誇  
自知終古清香在  
更出梅粧弄晚霞

賁字潤卿南陽人登大中進士第  
唐末爲廣文博士  
寓吳中與皮陸二生游  
其詩多羈旅感激若異鄉  
無限思盡付酒醺醺

送李穀西歸云孤雲獨鳥本無依  
江海重逢故舊稀  
楊柳漸疎蘆葦白  
可堪斜日送君歸

陸龜蒙

字魯望父虞賓浙東從事居蘇臺龜蒙攻文與顏  
蕘皮日休羅隱吳融友善家貧與張搏爲廬江  
吳興二郡丞李蔚盧攜景重之羅隱寄詩云龍  
樓李丞相昔歲仰高文黃閣今無主青山竟不  
焚夜船乘海月秋寺伴江雲只恐塵埃裏浮名  
點污君唐末以左拾遺授之詔下日以疾終于  
家

皮日休松陵唱和集序云咸通十年日休爲吳郡  
部從事有進士陸龜蒙以其業見造其才之變  
真天地之烝也近代稱溫飛卿李義山爲之最  
俾生參之未知孰爲後先

龜蒙三吳人也博雅多文尤善談笑嘗體江謝賦  
事名振吳下藏書萬餘卷詩篇清麗與皮日休  
爲友唱和若干卷號曰松陵集中和初遇疾而  
卒陳給事爲文誌其墓矣吳子華莫文千餘言  
畧曰長風吹海海波淪漣涵爲子文無隅無邊

長松倚雪枯枝半折挺爲子文直上嶺絕風下  
霜晴寒鐘自聲發爲子文鏗鏘杳清武陵深聞  
川長畫白間爲子文渺茫岑寂豕突鯨狂其來  
莫當雲沉鳥沒去其倏忽膩若凝脂軟於無骨  
霏漠漠澹涓涓春哆冶秋鮮妍觸卽碎潭下月  
拭不滅玉上烟

江湖散人歌云江湖散人天骨竒短髮搔來蓬半  
垂手捉孤篁曳寒繭口誦太古滄浪詞詞云太

古萬萬古民性甚埜無風期夜棲正與禽獸雜  
獨自架結縱橫枝因而稱曰有巢氏民共敬貴  
如君師當時只効烏鵲輩豈是有意陳尊卑無  
端後聖穿鑿破一派前導千流隨多方惱亂元  
氣死日使父子生姦欺聖人事業轉消耗尚有  
漁者存熙熙風波不獨因一士凡百器具皆能  
施爪踈扈腐鱸鰕脫上失檢馭無讒疵人間所  
謂好男子我見婦女留鬚眉奴顏婢膝真乞丐

反以正直爲狂癡所以頭欲散不散弁戕魏所  
以腰欲散不散珮陸離行散任之適坐散從傾  
歌語散空谷應笑散春容披衣散單複便食散  
酸醎宜書散渾真草酒散甘醇醯屋散勢斜直  
樹散行參差客散忘簪裾禽散空籠池外物一  
以散中心散何疑不共諸侯分邑里不與天子  
專隍陴靜則守桑柘亂則逃妻兒金鑣紳帶未  
嘗識白刃投我窮生爲或聞藩將負恩澤號令

鐵馬如風馳大君年小丞相少當軸自請都旌  
旗神鋒悉出羽林仗繪畫日月蟠龍螭太宗基  
業甚牢固小醜背叛當殲夷禁軍近自肅宗署  
抑遏輔國爭雄雌必然大段剪兇逆須召勁勇  
持軍麾四方賊壘猶占地死者暴骨生寒飢歸  
來輒擬荷鋤立詬吏已責租錢遲興師十萬一  
日費不翅千金何以支祗今利口且箕歛何暇  
俛首哀惻嫠均荒補敗豈無術布在方策撐頹

層言新事 九  
噉冰霜襦袴易反掌白面諸郎殊不知江湖散  
人悲古道悠悠幸寄羲皇傲官家未議活蒼生  
拜賜江湖散人號

甫里先生傳云少攻歌詩與造物者爭柄遇事輒  
變化不一其體裁始則凌轢波濤穿穴險固囚  
鎖恠異破碎陣敵卒造平澹而後已

龜蒙居震澤之南巨積莊有鬪鴨一欄有驛使過  
挾彈斃其尤者龜蒙手一表本云此鴨能人語

待附蘇州上進使者斃之奈何使恐酬以囊中  
金候其稍悅方請人語之由曰能呼其名使人  
憤且笑拂袖上馬復召之還其金曰吾戲耳龜  
蒙少高放從張搏遊歷湖蘇二州辟以自佐嘗  
至饒州三日無所詣刺史蔡京率官屬就見之  
龜蒙不樂拂衣去不喜交流俗不乘馬升舟設  
蓬席齋束書茶竈筆床釣具往來時謂江湖散  
人或號天隨子甫里先生自比涪翁漁父江上

唐詩紀事  
十  
丈人

皮日休

日休字襲美襄陽人咸通中爲太常博士遭亂歸  
吳中黃巢寇江浙劫以從軍至京師以爲僞翰  
林學士今日休作識云欲識聖人姓田八二十  
一欲知聖人名果頭三屈律巢大怒蓋巢頭醜  
掠鬢不盡疑譏之也遂及禍

日休寒日書齋卽事云參佐三間似草堂恬然無  
事可成忙移時寂歷燒松子盡日慙懃拂乳床  
將近道齋先衣褐欲清詩思更焚香空庭好待  
中宵月獨禮星辰學步罡又云不知何事有生  
涯皮褐親裁學道家深夜數甌惟柏葉清晨一  
器是雲華盆池有鷺窺萍沫石版無人埽桂花  
江漢欲歸應未得夜來頻夢赤城霞又云方朔  
家貧未有車肯從榮利捨樵漁從公未恠多侵  
酒見客惟求轉借書暫聽松風生意足偶看溪

唐詩紀事 十一  
月世情疎如鈎得貴非吾事合向烟波爲五魚  
日休賦龜詩嘲歸氏子曰硬骨殘形知幾秋屍骸  
終是不風流頑皮死後鑽須遍都爲平生不出  
頭歸氏子以姓嘲日休云八片尖斜砌作毬火  
中燖了水中揉一包閑氣如常在惹踢招拳卒  
未休

北夢瑣言云日休傲誕自號間氣布衣日休之子  
光業辭學宏贍唐末爲越州副使

松陵集序曰詩有六義其一曰比比者定物之情  
狀也則必謂之才才之備者於聖爲六藝在賢  
爲聲詩噫春秋之後頌聲亡寢降及漢氏詩道  
荐作然二雅之風委而不興矣在詩有三言四  
言五言六言七言之作三言者曰振振鷺鷺于  
飛是也五言者曰誰謂雀無角何以穿我屋是  
也六言者我姑酌彼金罍是也七言者交交黃  
鳥止于桑是也九言者曰洞酌彼行潦挹彼注

茲是也蓋古詩率以四言爲本而漢氏方以五言七言爲之也其句亦出於周詩五言者李陵曰携手上河梁是也七言者漢武曰日月星辰和四時是也爾後盛於建安以降江左君臣得其浮艷然詩之六義微矣逮及吾唐開元之世易其體爲律焉始切於儷偶拘於聲勢然詩云靚潤旣多受侮不少其對也工矣堯典曰聲依永律和聲其爲律也甚矣由漢及唐詩之道盡

矣吾又不知千祀之後詩之道止於斯而已卽後有變而作者不得以知之夫才之備者猶天地之氣乎氣者止乎一也分而爲四時其爲春則煦枯發枿如棄如濩百物融洽酣人肌骨其爲夏則赫曦朝升天地如窰草焦木暍若燎毛髮其爲秋則涼颼高警若露天骨景爽夕清神不蔽形其爲冬則霜陣一淒萬物皆瘁雲沮日慘若憚天責夫如是豈拘於一哉亦變之而已



人之有才者不變則已苟變之豈異於是乎故  
才之用也廣之爲滄溟細之爲溝竇高之爲山  
嶽碎之爲瓦礫美之爲西子惡之爲敦洽壯之  
爲武賁弱之爲處女大則八荒之外不可窮小  
則一毫之末不可見苟其才如是復能善用之  
則庖丁之牛扁之輪郢之斤不足謂其神解也  
噫古之士窮達必形於歌詠苟欲見乎志非文  
不能宣也於是爲其詞詞之作固不能獨善必

須人以成之昔周公爲詩以貽成王吉甫作誦  
以贈申伯詩之酬贈其來尚矣後每爲詩必多  
□□爲□咸通七年今兵部令狐員外在淮南  
今中書舍人□□公守毘陵日休皆以詞獲幸  
悉蒙以所製命之和各□□軸亦有名其守者  
十年大司諫清河公出牧於吳日休爲郡從事  
居一月有進士陸龜蒙字魯望者以其業見造  
凡數編其才之變真天地之氣也近代稱溫飛

唐詩紀事 十四  
卿李義山爲之最俾生參之未知其孰爲之後  
先也

雜體詩序云案舜典帝曰夔命汝典樂教胄子詩  
言志歌永言在周禮太師之職掌教六詩諷賦  
比興風雅互作雜體遂生然後係之於樂府蓋  
典樂之職也在漢代李延年爲協律造新聲雅  
道缺樂府乃盛饒歌鼓吹拂舞千俞因斯而興  
詞之體不得不因時而易也古樂書論之甚詳

今不能備載載其他見者漢武元封三年作柏  
梁臺詔群臣二千石有能爲七言詩者乃得上  
坐帝曰日月星辰和四時梁王曰驂駕駟馬從  
梁來由是聯句興焉孔融詩曰漁父屈節水潛  
匿方作郡姓名離合也由是離合興焉晉傳咸  
有迴文反復詩二首云反覆其文者以示憂心  
展轉也悠悠遠邁獨煢煢是也由是反復興焉  
梁武帝云後牖有朽柳沈約云偏眠船舷邊由

是疊韻興焉詩云蝓蝓在東又曰鴛鴦在梁由是雙聲興焉詩云惟南有箕不可以簸揚惟北有斗不可以挹酒漿近乎戲也古詩或爲之蓋風俗之言也古有採詩官命之曰風人圍碁燒敗襖看子故依然由是風人之作興焉梁書云昭明善賦短韻吳均善壓強韻今亦効而爲之存於編中陸生與予各有是爲凡八十六首如四聲詩三字離合全篇雙聲疊韻之作悉陸生

所爲又足見其多能也案齊竟陵王郡縣詩曰追芳承荔浦一道信雲丘縣名由是興焉案梁元藥名詩曰戍客柏水下當思衣錦歸藥名由是興焉陸與予亦有是作至如鮑昭之建除沈炯之六甲十二屬梁簡文之卦名陸惠曉之百姓梁武帝之鳥名龜兆蔡黃門之口字古詩兩頭纖纖藁砧五雜俎已降非不能也皆鄙而不爲噫由古至律由律至雜詩詩之道盡乎此也

近代作雜體惟劉賓客集中有迴文離合雙聲  
疊韻如聯句則莫若孟東野與韓文公之多他  
集罕見足知爲之之難也

日休疊韻山中吟云穿烟泉潺湲觸竹犢齧荒  
篁香墻匡熟鹿伏屋曲

雙聲溪上思云疎杉低通灘冷鷺立亂浪草彩欲  
夷猶雲容空澹蕩

晚秋吟

以題中三字韻合

東臯烟雨歸耕日免去黃冠首

刈禾火滿酒爐詩在口今人無計奈儂何

藥名離合夏日卽事云季春人病拋芳杜仲夏溪

波遶壞垣衣典濁醪身倚桂心中無事到雲昏

懷鹿名縣名離合云山瘦更培秋後桂溪澄閑數

晚來魚臺前過鴈盈千百泉石無情不寄書

寒日古人名云北顧歡遊悲沈宋

梁武改爲北顧

南徐陵

寢歎齊梁水邊韶景無窮柳寒被江淹一半黃

風人詩云江上秋聲起從來浪得名逆風猶掛席

唐詩紀事  
十七  
苦不會帆情

陸龜蒙詩云十萬合師出遙知至憶君一心如瑞  
表惟作兩岐分

崔璐

璐有覽皮先輩盛製詩贈日休云河嶽挺靈異星  
辰精氣殊在人爲英傑與國作禎符襄陽得竒  
士俊邁真龍駒勇果魯仲由文賦蜀相如渾浩  
江海廣葩華桃李敷小言入無間大言塞空虛

幾人遊赤水夫子得玄珠鬼神爭奧秘天地惜  
洪爐旣比曾參行仍兼君子儒吾知上帝意將  
使居黃樞好保千金體須爲萬姓謨

日休和云伊余幼且賤所稟自以殊弱歲謬知道  
有心臣皇符豈意海上鷹運跼軒下駒縱性作  
古文所爲皆自如但恐才格劣敢誇詞彩敷句  
句考事實篇篇窮玄虛誰能變羊質競不獲驪  
珠奧有造化手曾聞天地爐文章鄴下秀氣貌

淹中儒展我此志業期君持中樞蒼生眼穿望  
勿作磻溪謨

璐登咸通七年進士第

任蕃

宮怨云淚乾紅落臉心盡白垂頭自此方知怨從

來豈信愁

蕃又有無語與春別細看枝上紅之句張為取作

主客圖

盧休

春寒酒力遲冉冉生微紅寒月自然草木性誰祝

元化功句湓浦風生破膽愁句血染劍花明帳

幕三千車馬出漁陽句右張為取作主客圖

劉畋

畋有晚泊漢江渡詩云末秋雲木輕蓮折晚香清

雨下侵苔色雲涼出浪聲疊帆依岸盡微照夾

堤明渡吏已頭白遙知客姓名又有雨後句云

殘陽來霽岫獨興起滄洲張爲取作主客圖

唐詩紀事卷第六十四

唐詩紀事卷第六十五

袁郊

月詩云嫦娥竊藥出人間藏在蟾宮不放還后羿  
遍尋無覓處誰知天上却容姦

霜詩云古今何事不思量盡信鄒生感彼蒼但想  
燕山吹暖律炎天豈不解飛霜

露詩云湛湛騰空下碧霄地卑濕處更偏饒管茅  
豐草皆霑潤不道良田有旱苗

唐詩紀事  
卷六十五  
及古詩  
雲詩云楚甸嘗聞旱魃侵從龍應合解爲霖荒淫  
却入陽臺夢惑亂懷襄父子心

郊咸通時爲祠部郎中有甘澤謠九章與溫庭筠  
酬唱庭筠有開成五年抱疾不得預計偕詩寄  
郊云逸足皆先路窮交獨向隅是也

郊字之儀滋之子也昭宗時爲翰林院學士

### 盧延遜

延遜吟詩多著尋常容易語如送周太保赴浙西

云臂鷹健卒懸羶帽騎馬佳人卷畫衫又寄友

人云每過私第邀看鶴長著公裳送上驢然於

數篇見境尤妙有松寺云山寺取涼當夏夜共

僧蹲坐石堦前兩三條電欲爲雨七八箇星猶

在天衣汗稍停床上扇茶香時潑澗中泉通宵

聽論蓮華義不藉松窓一覺眠又苦吟云莫話

詩中事詩中難更無吟安一箇字撚斷數莖鬚

險覓天應悶狂搜海亦枯不同文賦易爲著者



唐詩紀事 二  
之乎又贈僧云浮世浮華一斷空偶拋煩惱到  
蓮宮高僧解語牙無水老鶴能飛骨有風野色  
吟餘生竹外山陰坐久入池中禪師莫問求名  
苦滋味過於食蓼蟲曾獻王建詩有栗爆燒氈  
破猫跳觸鼎翻後建冬夜與潘峭平章邊事旋  
令宮人燒栗俄有數栗爆出燒繡褥時建多疑  
常於爐中燒金鼎命二妃親侍茶湯而已是夜  
宮猫相戲悞觸鼎翻建良久曰栗爆燒氈破猫

跳觸鼎翻憶得盧延遜卷有此一聯乃知先輩  
裁詩信無虛境來日遂有六行之拜自給事中  
拜工部

翰林學士吳融獨重其作盛稱於時凡云語不  
尋常後必垂名楊大年云延遜詩至今存人亦  
有絕好之者其播人口有旅舍言懷云名紙毛  
生五門下家僮骨立六街中蜀路云雲間鬧鐸  
驟馱至雪裏殘骸虎拽來懷江上云餓猫臨鼠  
穴嚙犬舐魚砧八月十六日夜云只訛夢子綠

應耗沒多光寄人云吟安一箇字撚斷數莖鬚  
冬夜云樹上諮諏批頰烏窓間壁駮叩頭蟲哭  
人云漸窮頑僕慵看馬著慘佳人暗理箏狐衝  
官道過犬刺店門開租張相每稱之餓猫臨鼠  
穴噉犬舐魚砧成中令每稱之栗爆猫跳之句  
王建愛之盧曰平生投謁公卿不意得猫狗力  
延遜始投贄吳子華子華讀至不同文賦異爲  
下者之乎笑曰上門惡罵來

本朝楊億在翰苑嘗召對上言及延遜詩曰臂鷹  
健卒懸氈帽騎馬佳人卷畫衫似此淺近亦自  
成一體

延遜字子善范陽人光化初登第從事朗陵雷滿  
敗歸王建僭位授水部外郎卒于刑部侍郎師  
薛能爲文

裴說

裴詣

唐舉子先投所業於公卿之門謂之行卷說只行

唐詩紀事 四  
五言十九首至來年秋賦復行舊卷人有譏之者說曰只此十九首苦吟尚未有人見知何假別行卷哉識者以爲知言說天復六年登甲科其詩以苦吟難得爲工但拘格律嘗有詩曰苦吟僧入定得句將成功又贈僧貫休云總無方是法難得始爲詩又云是事精皆易唯詩會却難遭亂故宦不達多遊江湖間有石首縣詩云因携一家住贏得半年吟深閨乍冷開香篋玉

筋微微濕紅頰一陣霜風殺柳條濃烟半夜成黃葉重重白練明如雪獨下閑堦轉淒切祗知抱杵搗秋砧不覺高樓已無月時聞寒鴈聲相喚紗窓只有燈相伴幾展齊紈又懶裁離腸恐逐金刀斷細想儀形執牙尺回刀剪破澄江色愁捻銀針信手縫惆悵無人試寬窄時時舉袖勻紅淚紅牋謾有千千字書中不盡心中事一半慙勤寄邊使此說聞砧詩也說終禮部員外

郎說與詣俱有詩名詣唐天祐二年登第終于  
桂嶺假官宰字而已同在湘江說詩云吟餘潮  
落岬冰高經杜甫墳云擬掘孤墳破重教大雅  
生詣云名終埋不得骨且朽何妨景同而語意  
俱別實爲雙美說旅行聞寇云寸步邊多事將  
行問四隣深山不畏虎當路却防人無事助明  
代何門銷此身空懸兩行淚飄灑向紅塵

洛中作云莫恠苦吟遲詩成鬢亦絲鬢絲猶可染

詩病却難醫山暝雲橫處星沉月側時冥搜不  
堪得一句至公知

中秋月云一歲幾盈虧當軒重此期幸無偏照處  
剛有不明時色靜雲歸早光凝故宿遲望吟吟  
未足皎皎下疎籬

碁云十九條平路言平又嶮巖人心無筭處國手  
有輸時勢迥流星遠聲乾下雹遲臨軒纔一局  
寒日又西垂

喜友人再面云一別幾寒暄迢迢隔塞垣相思長  
有事及見却無言靜坐將茶試閑書把葉翻依  
依又留宿圓月上東軒

張爲

秋醉歌云金風颯颯起還是招漁翁携酒天姥岑  
自彈嶧陽桐脫却登山履赤脚翹青筇泉聲埽  
殘暑猿臂攀長松翠微泛樽綠苔蘚分烟紅造  
化處術內相對數壺空醉眠嶺上草不覺夜露

濃一夢到天曉始覺一醉中皎然夢中路直到  
瀛洲東初平把我臂相與騎白龍三留對上帝  
玉樓十二重上帝賜我酒送我敲金鐘寶閣香  
歛葍琪樹寒玲瓏動葉如笙簧音律相怡融珍  
重此一醉百骸出天地長如此夢魂永謝名與  
利

爲唐末江南詩人與周朴齊名如到處卽閉戶逢  
君始展眉最有詩稱

爲作詩人主客圖序曰若主人門下處其客者以  
法度一則也以白居易爲廣大教化主上入室  
楊乘入室張祜羊士諤元稹升堂盧仝顧況沈  
亞之及門費冠卿皇甫松殷堯藩施肩吾周元  
範況元膺徐凝朱可名陳標童翰卿以孟雲卿  
爲高古奧逸主上入室韋應物入室李賀杜牧  
李餘劉猛李涉胡幽正升堂李觀賈馳李宣古  
曹鄴劉駕孟遲及門陳潤韋楚老以李益爲清

竒雅正主上入室蘇郁入室劉畋僧清塞盧休  
于鵠楊洵美張籍楊巨源楊敬之僧無可姚合  
升堂方干馬戴任蕃賈島厲元項斯薛壽及門  
僧良又潘誠于武陵詹雄衛準僧志定喻島朱  
慶餘以孟郊爲清竒僻苦主上入室陳陶周朴  
及門劉得仁李溟以鮑溶爲博解宏拔主上入  
室李群玉入室司馬退之張爲以武元衡爲瓌  
竒美麗主上入室劉禹錫入室趙嘏長孫佐輔

曹唐升堂盧頻陳羽許渾張蕭遠及門張陵章  
孝標雍陶周祚袁不約

杜光庭載毛仙翁事云仙翁名于字鴻漸元和間  
劉禹錫李紳白樂天輩皆贈詩至大中戊寅五  
十餘年矣是歲張爲薄遊長沙不汲汲隨計獲  
女奴於嶽麓下惑之歲餘成羸疾仙翁一見曰  
子妖氣邪光浹遍肌骨苟不相值殞於旦夕也  
以一粒授爲於香爐焚之郁烈之氣聞百步魅

妾一號而斃乃木偶人也又吞以丹砂如黍者  
三疾遂瘳爲作詩別之曰羸形感神藥削骨生  
豐肌蘭炷飄靈烟妖恠立誅夷重覩日月光何  
報父母慈黃河濁袞袞別淚流澌澌黃河清有  
時別淚無收期爲後入釣臺山訪道而去

韓偓

偓父瞻開成六年李義山同年也義山有餞韓同  
年西迎家室戲贈云籍籍征西萬戶侯新緣貴

唐詩紀事 九  
堦起珠樓一名我漫居先甲千騎君翻在上頭  
雲路招邀回綵鳳天河迢遞笑牽牛南朝禁鬱  
無人寄瘦盡瓊枝爲四愁

偓小字冬郎義山云嘗卽席爲詩相送一座盡驚  
句有老成之風因有詩云十歲裁詩走馬成冷  
灰殘燭動離情桐花萬里丹山路雛鳳清於老  
鳳聲偓字致堯今日致光誤矣自號玉山樵人  
苑中云上苑離宮處處迷相風高與露盤齊金堦

鑄出狡狴立玉柱雕成翡翠啼外使調鷹初得

按

五方外使以鷹隼初調  
習使能禽獲謂之得按

中官過馬不教嘶

上乘

馬必中官馭以  
進謂之過馬

笙歌錦繡雲霄裏獨許詞臣醉

似泥

六月十七日召對詩云清暑簾開散異香恩深咫尺對龍章花應洞裏尋常發日向壺中特地長  
坐久忽疑槎犯斗歸來兼恐海生桑如今冷笑  
東方朔唯用詼諧侍漢皇



與吳子華侍郎同年玉堂伴直懷昔叙懇因成長  
句兼呈同年云往年鶯谷接清塵今日鰲山作

侍臣二紀計偕勞筆硯一朝宣入掌絲綸子與子華

俱久困名場聲名烜赫文章士金紫雍容富貴春絳

帳恩深無路報語餘相聚却酸辛

錫宴日詩云玉銜花馬踏天街詔遣追歡綺席開

中使押從天上去外人知自日邊來是日在外四考排門

齊入同進狀詞赴宴中使二人押出臣心淨比漪漣水聖澤深於

漱灑杯才有異恩頒稷卨已將優禮及鄒枚清

商迥向黎園降妙妓新行峽雨迴不敢通宵離

禁直晚乘殘醉入銀臺

醉著云萬里清江萬里天一村桑柘一村烟漁翁

醉著無人喚過午醒來雪滿船

卽日云書牆暗記移花日洗甕先知醞酒期須信

閑人有忙事早來衝雨覓漁師

春恨云殘夢依依酒力餘城頭鷓鴣伴啼鳥平明

乍捲西樓幕院靜初聞放轆轤

并州云戍旗青草接榆關雨裏并州四月寒誰會

憑欄潛忍淚不勝天際似江干

偓天復初入翰林其年冬駕幸鳳翔偓有扈從之

功返正初上面許偓為相奏云陛下運契中興

當復用重德鎮風俗臣座右僕射趙崇可克

是選乞迴臣之命授崇天下幸甚上喜歎翌日

制用崇暨兵部侍郎王贊為相時梁太祖在京

素聞崇之輕佻贊復有彙馳入請見於上前且

言二公長短上曰趙崇是偓薦時偓在側梁王

叱之偓奏曰臣不敢與大臣爭上曰韓偓出尋

謫官入閩故窓外日光飛野馬案前筠管長蒲

蘆謀身拙為安蛇足報國危曾捋虎鬚滿世可

能無默識未知誰擬試齊竽

香奩集和魯公之詞也惟其豔麗故貴後嫁其名

於偓疑平生著述分為續綸遊藝孝悌疑獄香

偓有詩曰手風慵展八行書眼暗休看九局圖

據言作嘉

奩篋金六集自爲遊藝集序云予有香奩篋金集不行於世凝在政府避議論諱其名又欲後人知之故遊藝集序實之此凝之意也

沈存中  
夢溪筆

談

### 曹松

天復初杜德祥王文放松及王希羽劉象柯崇鄭希顏等及第年皆七十餘時號五老榜時內難新平首求孤貧人德祥以松等塞詔各授授書

郎制曰念爾登科之際當予反正之年宜降異恩各膺寵命

松字夢徵舒州人也學賈司倉爲詩此外無他能時號松啓事爲送羊脚狀

松別湖州上主人云門繫釣舟雲滿岸借君幽致坐移旬湖村夜叫白蕪鴈菱市曉喧深浦人遠水日邊重作雪寒林燒後別生春不辭更後醒還醉太一東峰歸夢頻

李肇國史補云曲江大會此爲下第舉人邇來漸  
侈靡皆爲上列所占向之下第舉人不復預矣  
所以逼大會則先牒教坊請奏上御紫雲樓垂  
簾觀焉時或擬作樂則爲之移日故曹松詩云  
追遊若遇三清樂行從應妨一日春勅下後人  
置皮袋例以圖章酒器錢絹實其中逢花卽飲  
故張籍詩云無人不借花園宿到處皆携酒器  
行其皮袋狀元錄事同點檢闕一則罰金曲江  
之宴行市羅列闐闐爲之半空公卿家率以是  
日揀選東床車馬闐塞莫可殫述

松及第勅下宴中獻坐主杜侍郎詩云得召丘牆  
淚却頻若無公道也無因門前送勅朱衣吏席  
上銜杯碧落人半夜笙歌教洗月平明桃杏放  
燒春南山雖有歸溪路爭那酬恩未殺身

春日長安書事云浩浩看花晨六街揚遠塵塵中  
一丈日誰是晏眠人御柳舞着水野鶯啼破春

唐詩紀事 十四  
徒云還楚客猶自惜離秦

晨起云曉色教不睡卷簾清氣中林殘數枝月髮  
冷一梳風並鳥聞鐘語歆荷隔霧空莫徒營白  
日道路本無窮

弔北邙云山下望山上夕陽明又曛無人醫白髮  
少地著新墳歲代殊相遠賢愚旋不分東歸聊  
一弔亂木倚寒雲

松有詩云憑君莫話封侯事一將功成萬骨枯可

謂諳世故矣

### 杜荀鶴

荀鶴有詩名號九華山人大順初擢第授翰林學  
士主客外郎知制誥序其文爲唐風集或曰荀  
鶴牧之微子也牧之會昌末自齊安移守秋浦  
時年四十四所謂使君四十四兩佩左銅魚者  
也時妾有姪出嫁長林鄉正杜筠而生荀鶴擢  
第年四十六矣

溪興云山雨溪風卷釣絲瓦甃蓬底獨斟時醉來  
睡着無人喚流下前溪也不知

春宮怨云早被嬋娟誤欲粧臨鏡慵承恩不在貌  
教妾若爲容風暖鳥聲碎日高花影重年年越  
溪女相憶採芙蓉

荀鶴曾得詩一聯云舊衣灰絮絮新酒竹芻芻韋  
莊曰我道印將金鎖鎖簾用玉鈎鈎卽京兆大  
拜之祥也

贈僧云利門名路兩何憑百歲風前短燄燈只恐  
爲僧心不了爲僧心了總輸僧

時世行云夫因兵死守蓬茅麻苧裙衫鬢髮焦桑  
柘廢來猶納稅田園荒盡尚徵苗時挑野菜和  
根煮旋斫生柴帶葉燒任是深山更深處也應  
無計避徵徭又云八十老翁住破村村中牢落  
不堪論因供寨木無桑柘爲點鄉兵絕子孫還  
似平寧徵賦稅未曾州縣略安存至今雞犬皆

星散日落西山哭倚門

荀鶴擢第時危勢晏復還舊山田頔在宣州甚重之頔起兵陰令以牋問至梁太祖許頔厚遇及頔遇禍梁祖表授翰林學士主客員外郎知制誥恃勢侮易搢紳眾怒欲殺之而未及天祐初卒

顧雲序其詩曰大順初皇帝命小宗伯河東裴公掌邦貢次二年遠者來隱者出異人雋士大集

都下於群進士中得九華山人杜荀鶴拔居上第諸生謝恩日列坐既定公揖生謂曰聖上歛

文教未張思得如高宗朝射洪拾遺陳公名犯文宗

廟諱作詩出沒二雅馳驟建安削苦澁僻碎略淫

靡淺切破豔冶之堅陣擒雕巧之首帥皆摧撞折角崩潰解散埽蕩詞場豁清文稜然後有戴容州劉隨州王江寧率其徒揚鞭按轡相與呵樂來朝於正道矣以生詩有陳體可以潤國風

廣王澤故擢以塞詔竟勉爲中興詩宗生謝而  
退明年寧親江表以僕故山借隱者出詩三百  
篇見其雅麗激越之句能使貪吏廉邪臣正父  
慈子孝兄友弟悌人倫之紀備矣其壯語大言  
則決起逸發可以左攬工部袂右拍翰林肩吞  
賈喻八九於胸中曾不蠱介情動於中則極思  
冥搜神遊希夷形兀枯木五聲勞於呼吸萬象  
貧於抉剔信詩之雄傑者也美哉裴公之知人

爲不誣矣於戲旌別淑慝史臣之職僕幸得爲  
之敘錄視其人齒尚壯才力未盡謳吟之興方  
酣俟其繼作得如周頌者目之爲唐風集荀鶴  
初謁梁王朱全忠雨作而天無行雲梁曰此謂  
天泣知何祥先作無雲詩乃賦曰同是乾坤事  
不同雨絲飛灑日輪中若教陰翳都相似爭表  
梁王造化工梁悅之

孫榮



題妓王福娘牆詩云移壁迴窓廢幾朝指環偷解  
博蘭椒無端鬪草輸隣女更被拈將玉步搖

鄭谷寄臺院生端公祭詩云才屈道仍孤無何捨

釣徒班雖沾玉筍香不近金爐雨露瞻雙闕烟

波隔五湖唯君應是念曾共伏青蒲曾同 諫垣

祭贈妓人云綵翠仙衣紅玉膚輕盈年在破瓜初

霞盃醉喚劉郎賭雲髻慵邀阿母梳不怕寒侵

綠帶寶每憂風舉倩持裾謾圖西子爲粧樣西

子元來未得如

題北里妓人壁云寒繡衣裳餉阿嬌新圖香獸不

禁燒東隣起樣裙腰潤剩蹙黃金一兩條

王鐸

鐸字昭範重德名家位望崇顯率由文雅非定亂

才鎮渚宮爲都統以禦巢寇洎荊州失守復把

潼關黃巢差人傳語云令公儒生非我敵請自

退避無汚鋒刃於是棄關隨僖宗播遷於蜀再

授都統收復京師大勳不成竟落都統後有詩  
其要云黜詔已聞來闕下檄書猶未遍軍前亦  
志其事也

罷都統守鎮滑州作云用軍何事敢遷延恩重才  
輕分使然黜詔已聞來闕下檄書猶未遍軍前  
腰間盡解蘇秦印波上虛迎范蠡船正會星辰  
扶北極却驅戈甲鎮南燕三塵上相逢明王九  
合諸侯愧昔賢看却中興扶大業殺身無路好

歸田

鐸爲侍御史于興宗守綿州登越王樓以詩寄朝  
士鐸和云謝朓題詩處危樓壓郡城雨餘江水  
碧雲斷雪山明錦繡來仙境風雲入帝京恨無  
青玉案何以報高情

鐸謁梓潼張惡子廟詩曰盛唐聖主解青萍欲振  
新封濟順名夜雨龍拋三尺匣青雲鳳入九重

城

時僖宗幸蜀人情術  
士皆云春內當還京

劍門喜氣隨雷動玉壘

韶光待賊平惟報關東諸將相柱天功業賴陰  
兵

判度支蕭遇和云青骨祀吳誰讓德紫華居越亦  
知名未聞一劍傳唐王長擁千山護蜀城斬馬  
威稜應埽蕩截蛟鋒刃俟昇平鄮侯爲國親簫

鼓堂上神籌更布兵

時僖宗解劍贈  
神故二公賦詩

鄭綮

古今詩話曰相國綮善詩有題老僧詩云日照四

山雪老僧門未開凍瓶粘柱礎宿火燼爐灰童  
子病歸去鹿麕寒入來常云此詩屬對可以衡  
秤言輕重不偏也或曰相國近爲新詩否對曰  
詩思在灞橋風雪中驢子上此處何以得之蓋  
言平生苦心也

綮字蘊武大順後王政微綮每以詩謠託諷中人  
有誦之天子前者昭宗意其所蘊未盡因有司  
上班簿遂書其側曰可禮部侍郎同中書門下

平章事蔡本善詩其語多俳諧故使落調世號  
 鄭五歇後體至是省吏赴其家上謁蔡笑曰諸  
 君誤矣人皆不識字宰相亦不及我俄聞制下  
 歎曰歇後鄭五作宰相事可知矣立朝無復故  
 態纔三月去位

蔡刺廬江將去別郡人云惟有兩行公解淚一時  
 灑向渡頭風其滑稽類此

胡玠

玠不知何許人嘗隱廬山苦心於五七言桑落洲  
 一篇云莫問桑田事但看桑落洲數家新任處  
 昔日大江流古岸崩欲盡平沙長未休想應百  
 年後人世更悠悠又月詩云輪中別有物  
寧有光外更無空玠與李騰蘆問江西弓旌不  
至

楊牧

字藏之吳人呼爲神童兄發戲令詠蛙卽曰兔邊

分玉樹龍底耀銅儀會當同鼓吹不復問官私  
又令詠筆仍賦鑽字卽曰雖非囊中物何堅不可  
鑽一朝操政事定使冠三端

吳人造門請詩觀者壓敗其牆收嘲曰爾幸無羸  
角何用觸吾藩若是升堂者還應自得門

平曾

曾謁華州李固言不遇因吟一絕而去曰老夫三  
日門前立珠箔銀屏晝不開詩卷却拋書袋裏

正如閑看華山來

曾恃才傲物竟歿於縣曹薛平僕射出鎮浙西王  
禮稍薄曾留詩諷之曰梯山航海幾崎嶇來謁  
金陵薛大夫毛髮豎時趨劍戟衣冠儼處拜冰  
壺誠知兩軸非珠玉深愧三縑郵旅途明日過  
江風景好不堪回首望勾吳薛聞曾出境遣使  
追還縻留數日又獻繫白馬詩曰白馬披鬃練  
一團今朝被絆欲行難雪中放去空留跡月下

唐詩紀事 二十三  
牽來只見鞍向北長鳴天外遠臨風斜控耳邊  
寒自知毛骨還應異更請孫陽仔細看河東公  
曰若不留絆行軒那得觀其毛骨遂以殊禮相  
待

唐以府元被絀者九人曾其一也曾長慶二年同  
賈閔仙輩貶謂之舉場十惡曾後謁固於蜀幕  
中皆名士曾輕忽無所畏遂獻雪山賦李覽命  
推出不旬日再獻鰕魚賦曰此魚觸物而怒翻

身上波爲鳥鳶所獲奈魴鯉笑何李覽之遂不  
至深罪

繆島雲

島雲少從浮屠其詩尤尚竒險至如四五片霞生  
絕壁兩三行鴈過踈松又拋芥子降顛拂拂折  
楊枝灑醉惺惺

廬山瀑布曰白鳥遠行樹玉虹孤飲潭皆夔出前  
輩開成中常遊豫章武宗朝准勅反初名甚喧

然

唐詩紀事卷第六十五

唐詩紀事卷第六十六

馮涓

涓初除京兆府參軍恩地杜相審權有江西之拜  
 制未出召涓密語延辟之命戒勿泄涓漏其言  
 於友人鄭寬寬尋捧刺詣賀杜遂鄙涓淺薄不  
 預初選及廉車發日涓候別於長樂杜長揖曰  
 勉旃後分符眉州不得之任在西川重圍中跼  
 踏於陳田之間羈愁六年徒步糊口著懷秦賦

有南冠龍吟等集皆傷蹭蹬也集有蜀馱引其  
要云昂藏大步蠶鼓國曲頸微伸高九尺卓女  
窺窓莫我知嚴仙據按何曾識又題支機石云  
不隨俗物皆成土只待明時却補天惜知己之  
不遇也

涓字信之信都人大中初舉進士登宏詞科時危  
隱商山十年昭宗以爲眉州刺史陳田拒命涓  
棄郡於成都墨池灌園自給王建以爲翰林學

士雖詼諧傲物而多有補益卒於蜀

### 盧嗣立

望九華山云九華深翠落軒楹迥眺澄江氣象明  
不遇陰霾孤岫隱正當寒日衆峰呈坐觀松雪  
銷煩思惜別烟嵐駐曉行得路歸山期早訣夜  
來潛已告精誠

嗣立登會昌進士第

### 李質



質字公幹襄陽人應舉無成有親在衡湘往謁焉  
泝流至湓城豫章逐師捨舟由武寧而反會草  
寇殺其宰倉惶前去得日觀宿東房有酒數缸  
甚美遂携一壺上樓酌之因吟曰曾入桃溪路  
仙原信少雙洞霞飄素練蘚碧畫陰窓古木愁  
撐月危峰欲墮江自吟空向寂誰共倒秋缸吟  
畢如有人言曰土主尚書寓宿在此

質登第後二十年廉察豫章時大中十二年也出

科名分定錄

姚巖傑

巖傑梁國公元崇裔孫嘗以詩酒放遊江左乾符  
中顏標典藩鞠場亭宇初創命巖傑紀其事文  
成粲然標欲刊去一二字巖傑大怒標遂仆其  
碑巖傑以一篇紀之曰爲報顏公識我麼我心  
唯只與天和眼前俗物關情少醉後青山入意  
多田子莫嫌彈鋏恨甯生休唱飯牛歌聖朝若

唐詩紀事 三 汲古閣  
爲蒼生計也合公車到薜蘿盧肇牧歙州巖傑  
在婺源先以著述寄肇肇已知其人辭以兵火  
之後郡中凋弊無以迎逢大賢巖傑復以長箋  
激之肇不得已輟所乘馬迎至郡齋館穀如公  
卿禮旣而日肆傲睨肇嘗以篇詠吒於巖傑曰  
明月照巴山巖傑笑曰明月照天下奈何獨巴  
邪子發漸不得意無何會於江亭時蒯希逸在  
席肇改令曰目前取一聯象令主曰遠望漁舟

不濶尺八巖傑遽飲酒一噐凭欄嘔噦須臾卽  
席還令曰凭欄一吐已覺空喉有集二十卷目  
曰象溪子中和末豫章大亂巖傑病死

王璘

長沙日試萬言王璘詞學富贍崔詹事廉問表薦  
於朝先試之使解璘請十書吏皆給筆札璘口  
授十吏筆不停綴首題黃河賦三千字復爲鳥  
散餘花落詩二十首援筆而就時忽風雨暴至

唐詩集卷四  
數幅爲回飈所卷泥滓沾漬璘曰勿取但將紙  
來復縱筆一揮斯須復十餘篇矣時未亭午已  
七千餘言時路巖方當釣軸遣一介召之璘曰  
請俟見帝巖大怒亟命奏廢萬言科璘杖策而  
歸放曠杯酒間雖屠沽無間然矣璘與李群玉  
相遇嶽麓寺群玉曰公何許人璘曰日試萬言  
王璘群玉待之甚淺曰請與公聯句可乎璘曰  
唯子之命群玉破題而授之

不記其詞

璘畧不佇思

繼之曰芍藥花開菩薩面櫻櫚葉散野人頭群  
玉遂屈崔詹事遺璘夾纈數匹璘翌日以作中  
單襜褕衣之

### 嚴郭

賦百舌鳥云此禽輕巧少同倫我聽長疑舌滿身  
星未沒河先報曉柳猶粘雪便迎春頻嫌海燕  
巢難定却訝林鶯語不真莫倚清風更多事玉  
樓還有晏眠人

唐詩紀事  
五  
陳標

標贈元和十三年登第進士曰春官南院粉墻東  
地色初分月色紅文字一千重馬擁喜歡三十  
二人同眼看魚變辭凡水心逐鶯飛出瑞風莫  
惟雲泥從此別總曾惆悵去年中

標詠蜀葵花云能共牡丹爭幾許得人嫌處是花  
多韋絢曰鶴與鷓鴣皆胎化而人以鶴爲仙禽  
蓋鶴難見鷓鴣易見貴耳而賤目也遂誦標蜀

葵花詩以況之

啄木謠云丁丁向晚急還稀啄徧庭槐未肯歸終  
日與君除蠹害莫嫌無事不平飛

寄友人云杜甫在時貪入蜀孟郊生處却歸秦如  
今始會麻姑意借問山川與後人右張爲取作  
王客圖

標終侍御史長慶二年進士也

崔安潛

何澤韶陽曲江人也父鼎容管經畧有文稱澤乾  
寧中隨計至三峰行在永樂崔公安潛即澤之  
同年文人也聞澤來乃以一絕贈之曰四十九  
年前及第同年惟有老夫存今日殷勤訪吾子  
穩將鬢鬣上龍門時主文與奪未分又會相庭  
有所阻時崔相公徹侍權  
即永樂猶子也因之敗於垂成後飄  
泊關外梁太祖受禪澤假廣南幕職入貢勅賜  
及第

世謂崔魏公鉉好食新饌頭杜幽公悰每早食饋  
飯乾脯崔侍中安潛看鬪牛李衛公曰吾喜見  
未聞新書策

安潛字進之累爲西川平盧節度拜侍中自中令  
鎮荆南

盧發

杜蘊廉問長沙發爲從事往致聘焉發酒酣傲睨  
公公因改著詞令曰十姓胡中第六胡也曾金

闕掌洪爐少年從事誇門第莫向樽前喜氣麤  
盧答曰十姓胡中第六胡文章官職勝崔盧暫  
來關外分憂寄不稱賓筵喜氣麤公極歡而罷

錢珣

字端文吏部尚書徽之子善文辭宰相王搏薦知  
制誥進中書舍人搏得罪珣貶撫州司馬

珣客舍寓懷云灑灑灘聲晚霽時客亭風袖半披  
垂野雲行止誰相待明月襟懷祇自知無伴侶

吟溪上路有時偷笑臘前枝牽情景物潛惆悵  
忽似傷春遠別離

春恨三首云負罪將軍在北朝秦淮芳草綠迢迢  
高臺愛妾蒐銷盡始得丘遲爲一招又云久戍  
臨洮報未歸篋香銷盡別時衣身輕願比蘭堦  
葉萬里還尋塞草飛又云永巷頻聞小苑遊舊  
恩如淚亦難收君前願報新顏色團扇須防白  
露秋

蜀國偶題云忽憶明皇西幸時暗傷潛恨竟誰知  
佩蘭應語宮臣道莫向金盤進荔枝

送王郎中云惜別遠相送却成惆悵多獨歸迴首  
處爭那暮山何

未展芭蕉云冷燭無烟綠蠟乾芳心猶卷怯春寒  
一緘書劄藏何事會被東風暗拆看

盧駢

盧駢員外一日休于青龍僧舍詞氣悽慘暮歸促

命筆題南楮曰壽夭雖云命榮枯亦太偏不知  
雷氏劍何處更衝天題畢草草而去涉旬卒咸  
通進士也

嚴憚

皮日休傷嚴子重序云余爲童在鄉校時簡上抄  
杜舍人牧之集見有與進士嚴憚詩後至吳一  
日有客曰嚴某余志其名久矣遽懷文見造於  
是樂甚觀其所爲文工於七字往往有清便柔

媚時可軼駿於常軌其佳者曰春光冉冉歸何處更向花前把一杯盡日問花花不語為誰零落為誰開余美之諷誦未嘗忘生舉進士亦十餘計偕余方寃之謂終有得於時也未幾歸吳興後兩月咸通十一年也嘗人至云生以疾亡於所居矣噫生徒以詞聞於士大夫竟不名而逝豈止此而湮沒耶江湖間多美材士君子苟樂退而有文者死無不為時惜可勝言耶於是哭而為

詩魯望生之友也嘗為我作詩云十哭都門榜上塵蓋棺終是五湖人生前有敵惟丹桂沒後無家祇白蘋箬下斬新醒處月江南依舊詠來春知君精爽應無盡必在鄆都頌帝晨項梁成鄆都官

頌曰紂絕  
標帝晨

陸魯望云嚴子重以詩遊於名勝間舊矣余晚於江南相遇甚樂不幸且沒襲美作詩序而弔之其名真不朽矣又何戚其死哉余因息悲而為



唐詩紀事 十  
之和云每憶江南日落春十年詩酒愛逢君笑  
蓉湖上吟船倚翡翠巖前醉馬分秣自汀洲連  
舊業豈無章疏動遺文猶憐未卜佳城處更斲  
要離冢畔雲

王渙 裴贄

大順中王渙自左史拜考功員外同年李德隣自  
右史拜小戎趙光胤自補袞拜小儀王拯自小  
版拜小勳渙首唱長句感恩上裴公曰青衿七

十榜三年建禮含香次第遷珠彩下連星錯落  
桂花曾對月嬋娟玉經磨琢多成器劍拔沈埋  
更倚天應念銜恩最深者春來爲壽拜尊前裴  
公答曰謬持文柄得時賢粉署清華次第遷昔  
歲策名皆健筆今朝稱職並同年各懷器業寧  
推讓俱上青霄肯後先何事老夫猶賦詠欲將  
酬和永留傳

渙惆悵詩云冰蠶薄絮鴛鴦綺半夜佳期並枕眠

唐詩紀事 十一  
鐘動紅娘喚歸去對人勻淚拾金鈿又云李夫  
人病已經秋漢武看來不舉頭得所濃華銷歇  
盡楚寬湘血一生休又云謝家池館花籠月蕭  
寺房廊竹颭風夜半酒醒憑檻立所思多在別  
離中又云隋師戰艦欲亡陳國破應難保此身  
訣別徐郎淚如雨鑑鸞分後屬何人又云七夕  
瓊筵往事陳蓼花蓮蒂共傷神蜀王殿裏三更  
月不見驪山私語人又云夜寒春病不勝懷玉

瘦花啼萬事垂薄倖檀郎斷芳信驚嗟猶夢合  
歡鞋又云嗚咽離聲管吹秋妾身今日爲君休  
齊奴不說平生事忍看花枝謝玉樓又云青絲  
一絡墮雲鬟金剪刀鳴不忍看持謝君王寄幽  
怨可能從此任人間又云陳宮興廢事難期三  
閣空餘綠草基狎客淪亡麗華死他年江令獨  
來時又云晨肇重來路已迷碧桃花謝武陵溪  
仙山目斷無尋處流水潺湲日漸西又云少卿

降北子卿還朔野離觴慘別顏却到茂陵惟一  
慟節毛零落鬢毛斑又云夢裏分明入漢宮覺  
來燈背錦屏空紫臺月落關山曉腸斷君恩信  
画工

渙字群吉大順二年侍郎裴贄下登第德隣拯光  
胤皆同年也

張曙

張曙崔昭緯中和初同舉相與詣日者問命曙時

自負才名藉甚以爲將來狀元崔亦分居其下  
日者殊不顧曙第目崔曰將來萬全高第曙有  
愠色日者曰郎君亦及第然須待崔拜相當此  
時過堂旣而曙果不終場昭緯首冠曙以篇什  
刺之云千里江山陪驥尾五更風水失龍鱗昨  
夜浣花溪上雨綠楊芳草爲何人後七年昭緯  
爲相曙方登第果於昭緯下過堂杜荀鶴同年  
生也酬曙詩云天上書名天下傳引來齊到玉

皇前大仙錄後頭無雪至藥成來竈絕烟笑躡  
紫雲金作闕夢拋塵世鐵爲船九華山叟驚凡  
骨同到蓬萊豈偶然

翁綬

詠酒云逃暑迎春復送秋無非綠蟻滿盃浮百年  
莫惜千回醉一盞能消萬古愁幾爲芳菲眠細  
草曾因雨雪上高樓平生名利關身者不識狂  
歌到白頭

綬登咸通進士第

戴司顏

景福中江西節度使鍾傳遣僧從約進法華經一  
千部上待之甚厚恩渥有加宣從約入內賜齋  
面錫紫衣一副將行太常博士戴司顏以詩贈  
行略曰遠來朝鳳闕歸去戀元侯時吳子華任  
中諫司顏仰公之名志在屬和以爲從約之資  
融覽之拊掌大笑曰這阿師更不要見便把拽

出得其承奉如此

司顏登大順進士第

孫定

定字志元涪州犬戎之族子長於儲定數舉矣儲  
方欲就貢訪於定定諛曰子儀表堂堂好將軍  
材何必以科第爲資儲銜之後儲貴達未嘗言  
定之長晚年喪志放意杯酒景福二年下第遊  
京西開遠門醉中走筆寄儲詩曰行行血淚灑

塵襟事逐東流渭水深秋愁跨蹇驢風尚緊靜投

孤店日初沉一枝猶挂東堂夢千里空馳北巷

心明月悲歌又前去滿城烟樹噪春禽定詩歌

千餘首多委於兵火竟無成而卒

趙牧

牧不知何許人也大中咸通中效李長吉爲短歌

對酒曰雲翁耕扶桑種黍養日烏手按六十花

甲子循環落落如弄珠長繩繫日未是愚有翁

臨鏡捋白鬚飢魂弔客吟古書馮唐八十無高  
車人生如雲在須臾何乃自苦七尺軀裂衣換  
酒且爲娛勸君朝飲一瓢夜飲一壺杞天崩雷  
騰騰紂非舜是何足憑桐君桂父豈勝我醉裏  
白龍多上昇菖蒲花開魚尾定金丹始可延君  
命其餘尤尚輕巧詞多不載

唐詩自咸通而下不足觀矣亂世之音怨以怒亡  
國之音哀以思氣喪而語偷聲煩而調急甚者  
忿目褊吻如戟手交罵大抵王化習俗上下俱  
喪而心聲隨之不獨士子之罪也其來有源矣  
司空圖輩傷時思古退已避禍清音泠然如世  
外道人所謂變而不失正者也余故盡取晚唐  
之作庶知律詩末技初若虛文可以知治之盛  
衰

盧注

注門族甲天下因宦家于荆南舉進士二十上不

唐詩紀事 十六  
第嘗賦詩曰惆悵興亡係綺羅世人猶自選青  
娥越王解破夫差國一箇西施也太多晚年失  
意賦酒胡子一篇云同心相遇思同歡擊出酒  
胡當玉盤盤中餽飢不自定四座清賓注意看  
可亦不在心否亦不在面狗客隨時自圓轉酒  
胡五藏屬他人十分亦是無情勸爾不耕亦不  
飢爾不蠶亦有衣有眼不能分黼黻有口不能  
明是非鼻何尖眼何碧儀形本非天地力彫鑿

匠意苦多端翠帽珠衫巧粧飾長安斗酒十千  
酤劉伶平生爲酒徒劉伶虛向酒中死不得酒  
池中拍浮酒胡一滴不入眼空令酒胡名酒胡

鄭愚

咸通中愚自禮部侍郎除鎮南海時崔魏公在荆  
南愚着錦襖子半臂袖卷謁文公大竒之會夜  
飲更衣賓從間竊謂公曰此應是慙其不稱旣  
而復易紅錦尤加煥麗衆莫能測愚爲進士時

未嘗以文章及魏公門至是乃贄所業崔歎賞  
曰真銷得錦半臂矣

愚作大瀉靈祐師銘云湖之南湘之西山大瀉深  
無蹊虎日嘯猿又啼雨撼撼風淒淒高入雲不  
可梯雖欲去誰與摧彼上人忘其身一宴坐千  
餘旬去無跡來無親夷積阻架嶙峋棟宇成供  
養陳我不知徒自勤物之生孰無情識好惡知  
寵驚真物藏百慮呈隨婉轉任崢嶸雲糊天月

不明金在鑛火收瑩我不知天地先無首尾功  
用全六度備萬行圓常自隨在畔邊要卽用長  
目前非艱難不幽玄哀世途苦馳驅覓作佛何  
其愚筭以沙登迷廬眠喘喘心區區見得失係  
榮枯棄知覺求形模近似遠易復難但無事心  
卽安少思慮簡悲歡淨蕩蕩圓團團更無物不  
勞看聽他語被人謾生必死理之常榮必悴非  
改張造衆罪欺心王作少福須天堂善惡報正



身當自結果無人將心作惡口脫空欺木石嚇  
盲聾牛阿房鬼五通專覷捕見西東禁定住陽  
朦朧與作爲事不同最上乘有想基無結淨本  
無爲人不見自心知動便是莫狐疑直下說沒  
文詞識此意見吾師

愚廣州人唐末爲相

王鐐

王鐐富有詞學數舉未捷門生盧肇等公薦於春

官云同盟不詞賢者受譏相子負薪憂臣致誚  
乃旌鐐嘉句曰擊石易得火扣人難得心今日  
朱門者曾恨朱門深聲藹然果擢上第鐐登咸  
通進士第宰相王播之弟炎生二子鐸鐐鐸相  
僖宗鐐累官至汝州刺史王仙芝陷郡城鐐貶  
韶州司馬終太子賓客

陳琬

鴻之子也咸通中佐廉使郭常侍銓于徐性耿介

唐詩紀事卷第六十六  
有所不合挈家居茅山平居焚香習禪妻子罕  
面寄居蘭若自述檀經三卷臨行留一章與其  
僧云行若獨輪車常畏大道覆止若圓底器常  
恐他物觸行止既如此安得不離俗乾符中第  
璉佐薛能幕於徐淑自丹陽棹小舟與相見能  
重其人延入城不可曰某已有誓不入公門矣  
薛移舟赴之話道永日不宿而去

唐詩紀事卷第六十六





